



# DECRETUM

SALUBERRIMÆ FACULTATIS PARIISIENSIS,

De Libro, M. LUDOVICI-JOANNIS

LE THIEULLIER,

*CUI TITULUS,*

OBSERVATIONES MEDICO-PRACTICÆ

PARIISIIS 1732.

LATUM DIE MERCURII QUINTA NOVEMBRIS 1732.

*M. Hyacintho-Theodoro BARON, Decano.*



NNO Domini suprà millesimum sep-  
tesimo trigésimo secundo, die Mer-  
curii quinto Novembris, horâ post meri-  
diem tertiâ, legitimè ut moris est, & per  
juramentum congregata fuit saluberrima Parisiensis  
Academiæ Facultas, auditura relationem Clarissi-  
morum Doctorum quibus demandata fuerat Provin-



cia examinandi Libellum cui Titulus est: *Magistri LUDOVICI-JONNIS LE THIEULLIER*, Doctoris Medici Parisiensis, Observationes Medico-Practicæ, Parisiis 1732, atque super Clarissimorum Virorum relatione deliberatura. Examinatores retulerunt Facultati.

1°. In hocce Libello fallacem & exitiosam faciendæ Medicinæ methodum contineri.

2°. Receptas & usû comprobatas huc usquè Præceos Medicæ leges in eodem Libello imperitè perverti, malignè depravari.

3°. Præfationem hujus Libelli temerariam & mendacem, Tyronibus insidiosam, non huic Facultati solum & ejus doctrinæ, sed & præstantioribus cujuscunque ævi regionisque Medicis esse injuriosam.

Quibus auditis, re in deliberationem missâ, collectisque omnium Doctorum suffragiis, Facultas, ut non minùs publicæ Civium salutis, quàm Tyronibus informandis consuleret, CENSUIT,

1°. Improbandum esse Libellum M. Ludovici-Joannis le Thieullier, eumque censurâ suâ notandum esse judicavit.

2°. Cùm non semel à Facultate decretum fuerit, pluribusque supremæ Curie Senatûs-consultis vetitum, ne quis Collegii Medici Parisiensis Doctor, ullum in lucem emittat de Medicinâ Librum inconsultâ Facultate, statuit iterùm hoc Decretum renovandum esse. Intereà monendum M.

3

Ludovicum-Joannem le Thieullier caveat in posterum ab edendis in lucem ullis de Medicinâ Libris inconsultâ Facultate , nisi malit nomen suum ex Doctorum albo expungi.

Denique ut omnibus urbis & orbis incolis notum sit quanto studio publicæ Civium utilitati , Tyronum informationi , suisque Doctoribus in officio continendis invigilet ordo saluberrimus , præfens Decretum publici juris faciendum esse voluit , valvisque Doctorum & in Compitis citò citiùs affigendum : Et sic conclusit.

*H. T. BARON, Decanus.*